

Atletismoa

Australiak badu heroia

*Cathy Freemanek erraz irabazi zuen 400 metroetako finala;
Michael Johnson ere aise ibili zen distantzia berean*

Imanol Murua Uria / Sydney
berriemaile berezia

OLINPIAR JOKOEN hasiera ekitaldian sugarra piztu zuenean, suzko eraztunak inguratu zuenean, labe baten erdian bezala sentitu zela esan zuen Cathy Freemanek. Baina labea ez zegoen beroenean. Beroenean, atzo jarri zen. Freemanek helmuga zeharkatu zuenean, 48 segundoz arnasari eutsi ondoren, orroa batean lehertu zen estadio osoa. Ezin zuen bestela izan. Freemanek irabazi beharra zeukan, eta irabazi egin zuen. Orain bai, Australiak badu Jokoetako heroia. Michael Johnsonek ere ezin zuen besterik egin: irabazi. Eta historia egin zuen, lehen atleta baita 400eko lasterketa bi Jokoetan segidan irabazten. Ez zuen, baina, munduko marka hautsi; Freemanen itzalean gertatu zen.

400 hesietako azken finalerdia hastear zela agertu ziren estadioaren bazter batera 400 metro emakumezkoen finaleko partaideak, eta harrezkero ikusleek arreta handiagoa jarri zieten Freemanen mugimenduei, pistana gertatzen ari zenari baino. Alde batera eta bestera mugituz zebilen Freeman, artaga. «Oso-oso urduri nengoen», aitortu zuen gero prentsurrekoan. Lehendik hasiak ziren txaloak eta oihuak areagotu egin ziren pistara sartu eta hasiera puntura hurbildu zirenean. Kanporaketetan ez bezala, gorputz osoko body-a, txano eta guzti, erakutsi zuen Freemanek



Cathy Freeman,
atzo,
urrearekin.

ROMEO GACAD / EPA

Freemani galdeketa

I. Murua Uria / Sydney
OLINPIAR JOKO batzuetan banakako domina bat lortzen duen lehen aborigena dela aipatu zitzaion prentsurrekoan Freemani, eta horren sinbolismoari buruz galdetu.

■ **Loreak zure amari eman dizkiozuenean, zure familiararen jatorriari buruz pentsatzen ari al zinen?**

Nire familiak etengabe gogorarazten dit nire jatorria zein den, nire sustriak aborigenak direla. Benetan asko hunkitzen nau nire familia horren pozik ikusteak: irribarre handiak, malko gutxi batzuk...

■ **Zorionak dominagatik.**

Amets garaiko istorio bat ote da? [Amets garaia, aborigenen mitologian munduaren hasieraren azalpena da, norbere bizitza hasi baino lehenagoko garaia; kazetari aborigen batek egin zion galdera]

Basora itzuli beharko dut, eta hango norbaiti galdetu... Nire olinpiar ametsa bete da.

■ **Bi banderak elkarrekin haizatu dituzu. Sinbolismo horrekin ezer aldatuko dela uste duzu?**

Gaur gertatu denak, nik sinbolizatzen dudanak, aldaketa eragin lezake jendearen jokaeretan. Jende desberdin asko poztu da. Eta ni pozik nago!

txandala kendu zuenean. Oso serio. «Dakidana besterik ez nuela egin behar ari nintzen pentsatzen».

Zekiena egiten hasi zen, epaileak irteera eman zuenean. Baina ez zirudien hasieran alde handirik hartu zuenik. «Entrenatzaileak esandakoa bete dut goitik behera: lehen 200 metroak lasai egiteko esan dit, eta azken 100 metroetan dena emateko». Izan ere, azken bihurturik irten zirenean, Lorraine Graham jamaikarra aurretik zetorrela zirudien, baina une bateko irudipena izan zen: 50 metro falta zirela, garaipena Freemanena zen. Urteko markarik onena egin zuen (49.11), baina ez zuen Atlantan bigarren egin zueneko hobetu —48.63, bere onena—. Grahamek eraman zuen zilarra, eta Merry britainiarrak brontzea. Freemanen aurkari zailena zirudiena, Guevara mexikarra, bosgarren izan zen.

110.000 ikusle zutik eta oihuka zirela, Australiako ehunka bandera eta dozenaka bandera aborigen airean, Freeman lurrean eseri zen. «Bakea», horixe sentitzen zuen une horretan. Lau urtetan —eta batik bat azken urte honetan— bere gainean sentitu duen presioaren ondoren, azken orduko urdurtasunaren ondoren, «a zer bakea!». Eta eseri egin zen. «Proba bukatu ondoren, jende guztia pozik, hunkiturik sentitzen nuen, nire inguruan, nire gainean... Eseri egin behar nuen! Normal, eroso sentitzen saiatu behar nuen».

Baina ezin. Arnasestuka zegoen oraindik, eta barre la-saigarririk ez artean. Zapatalak kendu eta, oinutsik, harmailetara hurbildu zen, han bi bandera hartzeko: Australiako eta aborigena. Jokoen aurretik baimena eman zion Australiako Olinpiar Batzordeak, irabaziz gero, bandera aborigena ere erakusteko. Biak esku batean hartuta eman zion itzulia estadioari, eta irribarre agertzen hasi zen orduan. Itzulia bukatzeaz zegoela harmailetara hurbildu, eta beste eskuan zeraman lore sorta amari eman zion, besarkatzeaz bat. Ordutik, irribarre barre bihurtu zen.

Michel Johnson
«sinestezina»

Inor ez zen konturatu ordurako 400 metro gizonezkoen finaleko partaideak irteera puntuan zeudela. Eta eten bat egin zuten ikusleek —bozgorailutik finala iragarri zute-nean— Johnsonek bere azken Jokoetan munduko marka berriro hautsiko zuen ikusteko. Ez zuen hautsi: 43.84rekin irabazi zuen, Alvin Harrison estatubatuarra izan zen bigarren eta Gregory Haughton jamaikarra hirugarren. Honi besarkada handi bat eman zion Johnsonek helmuga zeharkatu eta berehala. Harrisonekin eman zion gero itzulia estadioari, EEBBetako bandera bana eskuan zutela. Bozgorailuetan, Atlantan bezala, *you're unbelievable* (sinestezina zara) abestia jotzen ari ziren.

ONDO HITZ EGIN

EUSKARAZ EGIN, INGELESEZ EGIN.

IKAS EZAZU GURE ZENTROETAN EDO ETXETIK.

BILBO - CASTEIZ - IRUÑA - DONOSTIA - ARRASATE - OÑATI - GETXO. TEL 902 13 13 20

bai & by
land